

## PELAJAR 8

### NGESAL ATI

Ngesal ati siti singkang ti terubah ia ti patut digaga kitai ngambika kitai nerima selamat diberi Tuhan ngagai kitai enggau enda bebayar nengah Yesus Kristus.

“...Iya nya Yesus tu meh ti udah diregang kitai, Iya ti udah di-asuh Allah Taala nyadi Tuhan enggau Kristus! Lebu orang mayuh ninga jaku nya sida balat bendar tusah ati, lalu bejaku enggau Peter sereta sida rasul ti bukai, ko sida, ‘Menyadi, nama ti patut digaga kami?’ Ko Peter bejaku enggau sida, “Ngesal sereta lengka ka dosa kita, genap iko kita, lalu dibaptisa dalam nama Yesus Kristus; awak ka dosa kita di-ampun” (SPKR 2:36b-38a). Peda mega ba SPKR 17:30.

#### **A. NGESAL ATI UKAI SEMINA:**

##### **1. Ngasai Diri Besalah**

Pengasai ati diri besalah laban bedosa kitai udah nyadi sebedau kitai ngesal ati, tang nya ukai ngesal ati ti sebandar ia. Nadai siko pen orang ngesal ati semina sida iya empu ngasaika diri besalah laban mayuh dosa, tang enda mega semua orang ti berasai salah betul-betul ngesal ati.

“Tang lebu Paul majak bejako ngenang pasal pengelurus, jalai nagang diri enggau pasal Hari Pechara, Peliks berasai takut lalu bejako, ‘Nuan tau angkat diatu. Aku deka mesan ka nuan baru lebu maya bisi awak dudi ila” (SPKR 24:25).

Peliks ngasai iya besalah tang enda mega ngesal ati.

##### **2. Enda Semina Ngesal Ati Ketegal Dosa**

Bisi sekeda orang cukup ia ngesal ati ketegal mayuh dosa udah digaga sida, tauka laban sida udah ditemu orang ngereja penyalah. Mayuh orang ngesal ati, ukai kebuah ngesal ketegal penyalah ti digaga sida, tang ketegal ukum mati ti ninggang sida.

“Laban penusah ti bepun ari Allah Taala mai kitai ngesal ka dosa diri lalu dilepas ari ukum-lalu nadai ngasuh ngesal agi! Tang penusah ti bepun ari mensia tau ngasuh mati” (2 Kor. 7:10).

##### **3. Enda Semina Deka Nyadi Mensia ti Manah**

Mayuh orang nguji enggau pengering diri deka nyadi orang ti manah sereta ngubah chara pendiau pengidup diri empu. Pengawa tu siti pun ari pemendar, tang taja pia semua sida empu enda nemu enggau silik agi utai dipeguna ari ngesal ati ka semua dosa sida. “Kami bela udah serap dibalut dosa, datai ka pemanah pengawa kami nyau kamah laban penyai. Ketegal dosa kami, kami baka daun ti rangkai dipuput ka ribut” (Isa 64:6).

##### **4. Enda Semina Ngasi Bepengarap**

Ba dalam Bup Kudus, kitai macha senentang orang Parisi ti bepegai teguh ba perintah pengarap sida. Sida bepasa enggau besampi lalu bependiau orang ti bepengarap tang perangai sida mengkang sebaka orang jai.

“Lebuh Iya meda mayuh orang Parisi enggau orang saduki, datai minta Iya maptisa sida, ko iya bejako enggau sida, ‘Kita ular, sapa ti madah ngagai kita ngumbai kita ulih ngelari ka diri ari pengeringat Allah Taala ti nyau deka datai? Kereja pengawa kena nunjuk ka kita udah ngesal ati ka dosa diri. Anang arap ka diri ulih nyeliah ka utai nya ngena jaku, ‘Abraham nya aki kitai.’ Amat aku madah ka kita, Allah Taala tau ngambi batu tu lalu ngaga peturun ka Abraham! Kapak udah sedia kena mungga urat kayu; semua kayu ti enda bebuah badas deka ditebang lalu dibuai ka dalam api” (Mat 3:7-10). Peda mega Mat 5:20.

#### **5. Enda Semina Nemu Pemandar**

Bempu penemu ti dalam ba senentang pemendar enda nyamin pemendar nyadi amat idup ba dalam pengidup siko-siko orang. Pecaya ngena runding enda sebaka pecaya ngena ati (Rom. 10:10).

“Kati kita arap ka Allah Taala semina siko aja? Badas! Sida antu mega arap-begetar sereta takut. Kita beli! Kati kita ka meda pengarap ti nadai ngereja pengawa nya nadai guna sekali?” (Jam 2:19,20).

#### **B. NGESAL ATI TI BENDAR IANYA**

##### **1. Ngaku Dosa Ba Mua Allah Taala**

Ngesal ati ti bendar ianya ngesal ati ti enda nunjuk-nunjuk ba mua diri empu, tauka ba mua orang mayuh, tang ia ti beguna bendar ianya ngesal ati ba mua Tuhan enggau ngaku penyalah diri.

“Kasih ka aku, Allah Taala, laban pengerindu nuan meruan belama-lama. Buai dosa aku, laban penelap nuan besai. Buai abis penyai aku, lalu asuh aku tuchi ari dosa. Aku nemu penyalah diri; aku selalu ingat ka dosa diri. Aku udah bedosa ngelaban nuan-semina ngelaban nuan- lalu ngereja utai ti dikumbai nuan jai. Nya alai patut nuan nyara aku, lalu patut mega nuan ngukum aku” (Mas 51:1-4). Peda mega ba Masmor 38:8.

##### **2. Ngaku Dosa Diri Empu**

“Udah nya aku ngaku dosa diri ngagai nuan, aku enda belalai ka kereja ti salah. Aku ngaku utai nya ba mua nuan, lalu nuan ngampun semua penyai aku ti udah” (Mas 32:5).

“Tang enti kitai ngaku penyalah diri ngagai Allah Taala, iya endang tau dikarap sereta endang lurus lalu iya deka ngampun penyalah kitai lalu nuchi kitai ari semua penyai” (1 John 1:9).

“Pengidup enda tau lantang enti nuan belalai ka penyalah diri. Enti nuan ngaku lalu ngesal ka penyalah diri nya baru Allah Taala kasih ka nuan” (J. Dalam 28:13).

##### **3. Begedi Ka Dosa**

“Nuan rindu ka pengelurus lalu begedi ka penyai. Nya kebuah Tuhan ti Allah Taala nuan, milih nuan lalu ngasuh nuan gaga ari sida pangan nuan.” (Heb 1:9).

“.....Kita deka begedi ka diri empu ketegal semua utai ti dikereja kita” (Esek 20:43b).

**4. Enti Bisi Maya, Bayar Utang Kitai Ngagai Orang Ti Endur Kitai Berutang**

Sakius bediri lalu bejako enggau Tuhan, ko iya, “Tuhan, aku deka meri setengah ari semua reta aku ngagai orang ti seranta; lalu enti aku udah ngelakar sebarang orang, aku deka mayar orang ti dikelakar aku nya empat kali lipat” (Lk 19:8). Peda mega ba Adat Lewi 6:1-7.

**C. NGESAL ATI BEGUNA KA PENERANG**

**1. Ngelengka Ka Dosa**

“Anang nunda ulah aki ini kita. Dulu menya, sida ti nyadi nabi nusui pesan aku ngagai aki ini kita enda ngasuh sida ngereja penyai, enda ngasuh sida agi bedosa, tang sida enggai ninga lalu enda ngasi ka pesan aku” (Sek 1:4). Peda mega ba Galatia 5:19-21; Epesus 5:5.

**2. Ngelengka Ka Pengawa Dunya**

“Anang rindu ka dunya tauka barang utai ti enggi dunya. Enti kita rindu ka dunya, kita enda rindu ka Apai” (1 John 2:15). Peda mega ba James 4:4.

**3. Ngelengka Ka Ulah Jai Ti Udah Digaga Diri Empu**

“Iya mati ka semua orang, ngambi ka barang sapa ti agi idup enda idup ketegal diri empu, tang ketegal iya ti udah mati lalu di-angkat ka idup baru ketegal sida” (2 Kor 5:15). Peda mega Luke 14:26.

**4. Ngelengka Ka Diri Ari Kuasa Sitan**

“Nuan deka muka mata sida lalu mai sida pansut ari pemetang ngagai penampak, enggau ari kuasa Sitan ngagai Allah Taala” (SPKR 26:18a). Peda mega Kolosi 1:13.

**5. Pulai Ngagai Tuhan**

“Tang diatu aku ngasuh kita pulai ngagai aku, lalu aku deka pulai ngagai kita baru” (Sek. 1:3).

**6. Pulai Ngagai Pengidup Ti Bendar**

“Kita mega enda tau nyerah ka sebarang bagi tubuh kita ngagai dosa, lalu dikena ngereja penyai. Kita patut nyerah ka diri ngagai Allah Taala, baka orang ti udah di-angkat idup baru ari mati, lalu nyerah ka tubuh diri ngagai Allah Taala ka kereja ti lurus” (Rom 6:13).

**KOMITMEN AKU**

Aku mutus ati deka ngelengka ka diri ari semua kereja ti mai bedosa sereta ninggal ka dosa-dosa lama aku baka ti udah dipadah ka Tuhan ba senentang utai ti salah dikereja aku.